

Date – 27/10/2024

Time - 18:30 Hrs

1. Chief Minister Pu Lalduhoma'n Mizo territorial army battalion din rawtna chu Defence minister-in bawhzui a tiam niin a sawi.
2. Kohhran 8 thawhhona Council of Churches in Mizoram (CCM) chu vawiin khan hawn a ni.
3. Prime Minister Narendra Modi-a'n Digital Arrest hming pu-a, dawt hmanga phone atanga mi rikrap ching an awm chu enghelh awm a tih thu a sawi.
4. Punjab Police-in heroin Kg. 105 an man.

<><><>

#### MIZO TERRITORIAL ARMY

Chief Minister Pu Lalduhoma chuan Defence Minister Rajnath Singh hnena Mizo hlang awmna Mizo Territorial Battalion din an dil chu sorkar laipui-in a bawhzui dawn a ni a ti.

He thu hi nimin tlai a CM Conference Hall-a chanchinbumite a kawmna-ah sawiin Chief Minister chuan Delhi a zin hmasak lamah Defence Ministry ah Scouts battalion din an dil thu a sawi a. Sawrkar laipua thuneitute nen an sawi tlanna-ah Scouts Battalion chu China ramri-a duty tur an nih avangin territorial army dil zawk turin thurawn an pe tih sawiin Pu Lalduhoma chuan tun tuma Delhi a zinna ah Defence Minister Rajnath Singh hnenah a thlen leh thu a sawi a. Rajnath Singh chuan Mizo territorial army, Mizo hlang awmna din tura rawtna hi Cabinet Committee on Security thutkhawm leh hmasa berah putluh a tum thu a hrilh niin a sawi.

Pu Lalduhoma chuan an dil mek Mizo Territorial Army Battalion home and heart hi din a nih chuan Mizoram ramri-a duty tur leh Mizoram pawna tirthchhuah loh tur chi an ni tih a sawi bawk.

<><><>

#### CM TRIP

Chief Minister Pu Lalduhoma chuan Kolasib a nursing school chu nursing college a hlan kai a ni dawn niin a sawi.

Pu Lalduhoma chuan tun hnai a Delhi a sorkar laipui thuneitu hrang hrang an dawrna-ah Kolasib a nursing school chu nursing college a hlankai an remti a. Hemi tihputlinna atan hian cheng vaibelchhe 7 dah a nih thu an lo hrilh niin a sawi.

CM chuan village council te chan ve tur hun rei tak pek theih tawh loh pekna atan tunah hian cheng vaibelchhe 35 an rawn nawr chhuak niin a sawi a. Finance commission-in VC-te chan tur atana sum a ruahman thin kha a tang rei deuh a. Kum 2023-24 chin chauh an la la a. A hma lama Utilisation Certificate pek loh khan a dal a, a hnu lamah chuan la sanction zui leh zel tur a ni. Wildlife sanctuary a thawkte hian mite angin a hunah hlawh an la thei reng reng lo mai a, hei hi installment te te a sorkar laipui-in a rawn pek thin vang niin CM chuan a sawi a. Pawisa lah chu a lo thleng tlai thin si a. Chuvangin kum khatah installment 2-a siam turin an nawr a, installment khata a chanve ve ve ni turin an nawr a, chu chu remtihsakin tunah hian an hlawh tur second installment cheng nuai 152 an sanction nghal bawk niin a sawi.

Chhim lama thlawhna tumhmun din tura hma lak a nih dan sawiin Pu Lalduhoma chuan Buildwell private limited Noida amite nen an inbiak thu a sawi a. Anni hian a hmuna rawn enfiahin thlawhna tumhmun a siam theih dawn chuan anmahni senso in an rawn siam dawn a. An lo chhoh hunah inremnate siamin kalpui tum a nih thu a sawi bawk a ni. Hei bakah hian NBCC hovin an dawr thu CM chuan sawiin hmun engemawzatah tuikhuah tur an rawn en dawn niin a sawi a. A bik takin a biala Mat lui khuahna tur an rawn en dawn thu sawiin, tui in tur, kawlpheha siamna tur leh zinmite hipna leh sangha khawina atana ruahman tum a nih thu a sawi a. A ram leilungte drone hmanga endik tura lo chhoh thuai an tum thu an sawi tih a sawi a ni.

<><><>

#### STUDENT'S DAY

Education minister Dr Vanlalhlana chuan ram changkang apiangin zirna tha nei turin tan an la thin a, mi puitling chher chhuah tam an tum thin a ni a ti.

He thu hi vawiin Zirlaite Ni puala nimina thuchah a sawina-ah tarlangin minister chuan hmun hrang hranga zirlaite'n zirna tha an dawn theih na'n sorkarin tan a la zel a,

zirtirtu indaih lohna phuhruk nan Primary, Middle leh High School zirtirtu tur casual teacher thahnem tak lak an ni a, heng mite hi hmun kilkhawr zawka awm ten an tangkaipui hle a ni a ti a. Zirlaite chu All India level-a hna exam-ah leh zirna sang zawk zawmna atana entrance exam-ah te tun ai a lut tam thei tura inbuatsaih turin a fuih a. Zirlaite chu an zirlai tibuai thei ruihhlo laka inthiarfihlim tur leh HIV/AIDS laka him na'n mipat hmeichhiatna kawnga inthiarfihlim turin a chah baw. Ruihhlo ngai zinga a tam ber chuan kum 12 atanga kum 18 inkarah an ti tan a, High School leh Higher Secondary school an kal laiin nun an tikhaw lo hman a. Zoram tana inchher puitling ngei tura beiseite kha chhawr hleih theih loh in tam tak an awm mek a, a paw hle a ni a ti a ni.

<><><>

#### CCM

Mizoram Kohhran pariatte thawhhona tur Council of Churches in Mizoram (CCM) inkhawmpui chu nimin khan Mission Veng Presbyterian Kohhran Biak inah hman a ni a, vawiin chawhma inkhawmah khan hawn a ni.

CCM hawnna inkhawmpui hi Mizoram Synod Moderator Rev. R Vanlalngbaka'n kaihruiin rorel in hun hman a ni a. Inrinni khan rorel inkhawmpui hmasa ber tanin sum ruahman leh hmachhawp hrang hrangte ngaihtuah a ni a. Rorel inkhawmah hian kohhran pariat - Mizoram Presbyterian Kohhran, Mizoram Baptist Kohhran, Evangelical Church of Maraland, Isua Krista Kohhran, Lairam Isua Krista Baptist Kohhran, Independent Church of India, Evangelical Free Church of India leh Wesleyan Methodist Church, Mizoram-te atangin palai 521 an tel a ni.

Vawiin chawhma inkhawmah Mizoram Synod Moderator leh Joint Committee Chairman Rev. R Vanlalngbaka'n CCM hi a hawngin CCM hruaitu atana ruat mi 7-te chu chu Rev. Dr. H. Remthanga'n a dah nghet a. Chief Minister Upa Lalduhoma leh North East India Christian Council (NEICC) general secretary Rev. Ramengliana Sailo te'n chibai bukna thu an sawi baw a. CCM hruaitu atana thlan chhuah a dah ngheh takte hi President Rev. Dr. R. Lalbiakliana (BCM), Vice President Rev. B. Zazawna Lai (LIKBK) leh Rev. Lalrodinpuia LS Nghaling (IKK Bualpui Ng), General Secretary Rev. Dr. Lalmangaiha (MPC), Jt. Secy. Rev. T. Salaw (ECM), Treasurer Upa R. Lalmalsawma (MPC) leh Fin. Secy Rev. Jessai L. Neitham (EFCI) te an ni.

CCM hawnna inkhawmah hian Joint Committee-in an sawm angin MLA 26, central YMA president leh kohhran inpumkhatna atana a tir atanga hmalatu Mizoram Theological Association (MTA) hruaitute bakah kohhran hrang hrang atangin mi thahnem tak an tel a ni.

Council of Churches in Mizoram (CCM) hawnna inkhawmpui thupui atan "Kohhran Inpumkhatna" tih hman a ni. CCM – ah hian Mizoram Kohhran pariat an tel meka, member 3,000 nei chin tan tel theih a ni.

<><><>

#### CM REFUTES

BJP nen sorkar intawm siam a, deputy chief minister a BJP MLA pakhat chu deputy chief minister-ah lak luh a ni dawn ni awma sawi chu chief minister Pu Lalduhoma chuan thu dik lo a ni a ti.

BJP MLA Dr. K. Beichhua nena Delhi a zin duna BJP hruaitute hmu a puhna chungchanga chanchinbumite zawhna chhangin Pu Lalduhoma chuan Dr Beichhua nen hian an zin dun lo niin a sawi a. Nilaini zana Delhi-a Assam Rifles hotute nena inremna an ziahna a Dr Beichhua a lo tel ve a hmuh thu a sawi a. Hetah hian ZPM, MNF leh BJP MLA te pawh an tel niin a sawi. Assembly inthlan hnukung berah ZPM chu party mala sorkar siam thei turin thlan tlin an ni a, party dang thawhpui an mamawh lo tih Pu Lalduhoma chuan a sawi a. He thil hi thuthang dik lo khawi atanga lo chhuak nge a nih pawh hriat loh a nih thu a sawi a ni.

Congress hruaitu leh minister hlui Pu John Rotluangliana chuan Zirtawpni khan Aizawla Congress Bhavan-ah Mizoram deputy chief minister a nei mai thei tih sawi a hriat thu a sawi a. An tih ngam loh chuan BJP in an hrek an hlau si a, indawrna a kal mek tih Chiang takin a hre thawi niin Pu John Rotluangliana chuan a sawi a ni.

<><><>

#### MANN KI BAAT

Prime Minister Narendra Modi-a'n Digital Arrest hming pu-a, Police emaw CBI emaw Narcotics officer emaw nia inchhala phone atanga mi rikrap ching an awm chu enghelh tham a tling a ni, a ti. Vawiina Akashvani-a Mann Ki Baat hun a hmannaah he thu hi sawiin hetiang tih chingte chuan an va biakte mimal chanchin zawt chhuakin

thlabar takin an siam thin a ni, a ti a, hetiang tih chingte man chhuak turin agency hrang hrang leh state sorkar-te an thawkho a ni, a ti. Mi tam takin cheng nuai tel an hloh phah tawh tih sawiin dawt hmanga inbumna laka fimkhur turin mitin a chah a, investigative agency dik tak-te chuan an thil hriat duhte chu phone emaw video call emaw hmangin an zawt ngailo tih a sawi bawk.

(Byte)

Prime Minister chuan Atmannirbhar Bharat Abhiyan a hlawhtling chu lawmawm a tih thu sawiin India chu kawng engkimah a hlawhtling chho zel a ni, a ti a, tun hma-a ram dang atanga ram humhimna tur thil lei nasa ber thin ram India chu tunah chuan ram 85-a ram humhimna thil thawn chhuaktu ram a ni tawh a ni, a ti.

India chu thla chhim tawp thleng hmasa ber ram anih thu pawh tarlangin Asia rama Imaging Telescope MACE lian ber chu tun thla khan Ladakh-a Hanle-ah hawn a ni, a ti a, meter 4300-a sanga din, Made in India a ni, a ti.

<><><>

#### **PUNJAB HEROIN HAUL**

Punjab Police-ten nizana Pakistan-a inkhuar ruihhlo tawlh ru pawl atangin heroin Kg 105 an man. Counter Intelligence police-te hian heroin bakah Caffeine Anhydrous Kg 32, DMR Kg 17 leh pistol 6 an man tel bawk.

Punjab Police hotu, Gaurav Yadav-a'n social media-a a tarlan danin tuiptuah rubber tyre tube hmangin Pakistan atangin ruihhlo hi an rawn tawlh lut a, ramdanga inkhuar ruihhlo-a sumdawng thin mi 2 man an ni bawk.

<><><>